

gogor bada jartzen,  
ark diola izuba  
besteari sartzen.

---

## ASTOA.



Onek etzubelarik  
nekezkoa lana,  
guchi zioten ere  
ematen zer jana;  
eta ala zalako  
gose samar bizi,  
bein zuben egin bere  
echetik igasi.  
Serbitzen jarririkan  
chit urruti andik,  
an zituben billatu  
mudantza chit aundik;  
zer jana nai ainbeste  
izaten baitzuben,  
bañan nekea ere  
neurri artan zuben;  
egun guziyan etzan  
lanetik gelditzen,  
egur karreo zuten  
beti erabiltzen;  
ezpazan pizkor asten  
esatean arre,  
nagusiya jaikitzen  
zitzayon asarre;  
eta ala, pausoa  
laburtzen bazuben,

makillazoa aren  
truk gañean zuben:  
nola zeraman egur  
lerdena berekin,  
kostillak berotutzen  
ziozkan arekin;  
eta astoak gauza  
ikusteaz ala,  
len bañan gaizkiago  
askoz bizi zala,  
esan zuben:—lenago  
kontentu ez nintzan,  
gaizki bizi nintzala  
kejatutzen nintzan;  
bada orain nora bait  
mugitutzen banaiz,  
an igual gaizkiago  
berriz izango naiz,  
eta nola ez dagon  
bizitzerik lasa,  
naiago ditut emen  
nere penak pasa.

. . . . .

Au da ispillucho bat  
argiro dagona,  
onetan dedin jarri  
begira gizona;  
ikusi ditzan bere  
barreneko penak,  
eta beste alderdi  
askotan daudenak.

RAMON ARTOLA.